



Akcija Gibraltar: Tužilaštvo BiH traži pritvor za sve osumnjičene

ISTRAGA DO PODIZANJA OPTUŽNICA?



• Nakon obrade u SIPA, devet osumnjičenih ispitano u Tužilaštvu BiH, koje je od Suda BiH zatražilo njihov pritvor • Jučer se predao i Ejub Kučuk • Bakula bi dosad pobjegao da je to htio, kaže Martinović

Tužilaštvo Bosne i Hercegovine najavilo je jučer da će državnom Sudu uputiti prijedlog za određivanje mjere pritvora za devet osumnjičenih za organizovani i finansijski kriminal, a uhapšenih dan ranije u akciji Gibraltar. Po nalogu Suda i Tužilaštva BiH, podsjetimo, pripadnici Državne agencije za istrage i zaštitu (SIPA) u srijedu su uhapsili direktore HT Eroneta Stipu Prlića (1958) i Zorana Bakulu (1964), direktora marketinške agencije SV-RSA Nevena Kulenovića (1967), njegovu suprugu Belmu (1972) i brata Sanjina (1970), direktora Mreže Plus i suvlasnika banjalučke ATV Darka Aleksića (1965), zamjenicu generalnog direktora, direktoricu marketinga i glavnu i odgovornu urednicu PINKBH Lajlu Torlak (1978), te direktora agencije Fabrika i suvlasnika Radio Sarajeva Senada Zaimovića (1964), dok se osumnjičeni direktor agencije MITA Ejub Kučuk (1973) pripadnicima SIPA predao jučer ujutro.

Nakon predaje, po nalogu tužitelja iz Posebnog odjela za or-

ganizovani kriminal, privredni kriminal i korupciju, pretreseni su stan i prostorije koje je on koristio, nakon čega je predat postupajućem tužitelju.

Razlozi za pritvor

- Tužitelj i njegov tim radili su intenzivno u protekla 24 sata i ispitivali sve osumnjičene koji su lišeni slobode, saopšteno je jučer prijepodne iz Tužilaštva BiH.

Tužilaštvo je jučer, u zakonskom roku, Sudu BiH uputilo prijedlog za određivanje mjere pritvora za sve osumnjičene u ovom predmetu, a Sud BiH, prema zakonu, ima rok od 24 sata da zakaže ročište o ovom pitanju i donese odluku.

- Pritvor će biti zatražen iz razloga opisanih u članku 132. ZKPBiH, između ostalog, zbog opasnosti da bi osumnjičeni, boravkom na slobodi, mogli ometati istragu, prikrivati dokaze ili vršiti utjecaj na svjedoke ili saučesnike, saopšteno je jučer prijepodne iz Tužilaštva BiH.

Iz ove bh. pravosudne institucije zahvalili su jučer svim policijskim službenicima iz SIPA i entitetskih policijskih agencija koji su učestvovali u

akciji, kao i kolegama iz Slovenije, Austrije i Hrvatske, koji su pružili međunarodnu pravnu pomoć u ovom predmetu. Najavljen je i nastavak istrage u pravcu podizanja optužnice protiv osoba odgovornih za



Kučuku pretresen stan

Page: 2

Reach: 0


Country: BOSNIA AND HERZEGOVINA

Size: 916 cm2

2 / 2



Uhapšeni obrađeni u prostorijama SIPA



Prlić priveden u Mostaru

zloupotrebe i finansijske malverzacije u višemilionskim iznosima, za koje su oštećeni budžet i građani BiH.

Pripadnici SIPA, uz pomoć MUP-ova KS-a, RS-a, HNK-a i ZHK-a, u sklopu akcije Gibraltar, u srijedu su pretresli 16 lokacija na područjima Sarajeva, Banje Luke, Mostara, Posušja i Gruda. Iz SIPA je u srijedu rečeno da su osumnjičeni lišeni slobode zbog postojanja osnova sumnje da su počinili krivično djelo organizirani kriminal u vezi sa krivičnim djelima iz oblasti finansijskog kriminala i korupcije i to krivotvorenje službene isprave, zloupotreba službenog položaja ili ovlaštenja, pranje novca, porezna utaja, carinska prevara,

zatim krivična djela davanje dara ili drugih oblika koristi, primanje dara ili drugih oblika koristi i druga krivična djela.

- Istražnim djelima utvrđeno je da su članovi organizovane kriminalne grupe svojim nezakonitim radnjama, na osnovu krivotvorenih ili štetnih ugovora i faktura, stekli protivpravnu imovinsku korist u iznosu većem od pet miliona eura, kazala je Kristina Jozić, glasnogovornica SIPA, u srijedu.

Pojasnila je da su pomenuta sredstva izvučena na račune off-shore kompanija u inostranstvu. Dio novca je zadržan na računima tih kompanija, dok je drugi dio prebačen na račune osumnjičenih osoba u inostran-

stvo i korišten je za kupovinu luksuzne imovine u inostranstvu.

Podsjetimo da je po inicijativi austrijskih istražitelja svojevremeno pokrenuta međunarodna istraga zbog sumnje u pranje novca preko off-shore kompanije 3 media Ltd, koju je Kulenović registrovao na Gibraltaru, odakle i naziv aktuelne akcije. Na račun gibraltarske firme uplaćivani su enormni iznosi, a isto tako su s tog računa uplaćivani veliki iznosi na račune pojedinaca otvorene u inostranstvu. SIPA je početkom 2012, nakon što je Interpol zatražio pomoć bh. policije, dostavila materijal Tužilaštvu BiH, a Tužilaštvo je veoma brzo, prema pisanju Slobodne Bosne, taj predmet spustilo na Tužilaštvo HNK-a. S druge strane, Specijalno tužilaštvo Slovenije se prije šest godina uključilo u istragu i prije dvije godine je od kolega iz BiH zatražilo informacije o ovoj istrazi. Slovensko specijalno tužilaštvo odgovorilo je u srijedu Oslobođenju da je putem međunarodne pravne pomoći privremeno osigurana imovina u vrijednosti nešto manjoj od pola miliona eura, te da je istražni postupak još u toku.

Šta kažu advokati

Davor Martinović, branitelj osumnjičenog Bakule, kazao je ju-

čer posljedodne za Oslobođenje da od Tužilaštva BiH čeka prijedlog za određivanje pritvora.

- Čekamo da to bude službeno i da saznamo koja je satnica ročišta pred Sudom BiH. To mora biti u roku od 24 sata od primitka prijedloga Tužiteljstva. U ovom trenutku, još ne znamo kad će to točno biti, ali očekujem da bi trebalo biti sutra (petak; op. a). Iskreno se nadamo da Sud BiH neće prihvatiti prijedlog Tužiteljstva. Apsolutno smatram da ne postoji razlog za pritvor mog branjenika. Znamo da je od same inkriminacije prošlo toliko vremena, više od šest godina, kazao nam je Martinović.

Podsjetio je da je Bakula, od kada je dao iskaz pred Tužiteljstvom HNK-a, a da je htio, mogao i pobjeći i uništiti dokumentaciju. Martinović vjeruje da su i svjedoci već saslušani, te da otpadaju svi razlozi za određivanje pritvora za Zorana Bakulu.

Advokat Stipe Prlića Plamenko Čustović kratko je kazao za Oslobođenje da zasada ne želi davati nikakve izjave niti komentare povodom ovog slučaja.

- To je pravni postupak koji traje i treba vidjeti šta će se dalje dešavati, kako će se odlučiti po prijedlogu za pritvor, kazao nam je Čustović jučer. **M. Đ. R.**